



BARAZA LA WAWAKILISHI – ZANZIBAR

ORODHA YA SHUGHULI ZA LEO

BARAZA LA TISA LA WAWAKILISHI

MKUTANO WA SITA

Kikao cha Ishirini na Tatu – Tarehe 07 Juni, 2017.

Kikao Kitaanza Saa 3.00 (Tatu) Asubuhi
na Dua itasomwa.

I. HATI ZA KUWASILISHA MEZANI:

Makamo wa Pili wa Rais:

Kauli ya Serikali Kuhusiana na Skuli ya Darajani na Vikokotoni katika uendelezaji wa Ukanda wa Darajani (Darajani Corridor).

Waziri wa Fedha na Mipango:

Hotuba ya Makadirio ya Mapato na Matumizi ya Wizara ya Fedha na Mipango kwa Mwaka 2017/2018.

Mwenyekiti wa Kamati ya Fedha, Biashara na Kilimo:

Hotuba ya Maoni ya Kamati ya Fedha, Biashara na Kilimo kuhusu Makadirio ya Mapato na Matumizi ya Wizara ya Fedha na Mipango kwa Mwaka 2017/2018.

II. MASWALI:

Ofisi ya Makamu wa Pili wa Rais:

115. MHESHIMIWA SULEIMAN SARAHAN SAID (Jimbo la Chake Chake) – Atamuuliza Mheshimiwa Waziri wa Nchi, Ofisi ya Makamu wa Pili wa Rais:

Mji wa Chake Chake ambao ni Mji Mkuu nambari mbili Zanzibar umekuwa na msongamano wa watu pamoja na magari kutokana na ufinyu wa maeneo. Pamoja na ufinyu huo wa nafasi, uwanja wa Mpira wa Tibirinzi baadhi ya wakati hutumika kwa mikutano ya kisiasa na kusababisha hatari ya kukosa amani na utulivu kwa watumiaji wa Mji huo, wafanyabiashara na hata vikosi vya ulinzi kukosa udhibiti wa usalama wa watu na mali zao.

- (a) Je, uwanja huo unamilikiwa na taasisi gani ya Serikali.
- (b) Je, Serikali haioni kwamba kuendelea kutumia uwanja huo kwa mikutano na shughuli za kisiasa ni hatari.
- (c) Kama ni hatari kutokana na kukosekana kwa usalama, ni lini Serikali itapiga marufuku kutumika uwanja huo kwa mikutano na shughuli za kisiasa na kuendelea na matumizi ya michezo.

Wizara ya Kilimo, Maliasili, Mifugo na Uvuvi:

14. MHESHIMIWA KHADIJA OMAR KIBANO (Nafasi za Wanawake) – Atamuuliza Mheshimiwa Waziri wa Kilimo, Maliasili, Mifugo na Uvuvi:

Miongoni mwa lengo kuu la Serikali ya Mapinduzi ya Zanzibar ni kuweza kuondosha malalamiko makubwa yanayojitokeza siku hadi siku kwa baadhi ya wakulima wetu hususan wale waliopewa mashamba ya (eka tatu) ya Mikarafuu. Hata hivyo, inapofikia wakati wa chumo la zao hilo, hujitokeza baadhi ya watendaji wa Serikali kupita katika mashamba hayo

yaliyokodishwa bila ya kutoa taarifa yoyote kwa wamiliki wa mashamba hayo (wakodishaji).

- (a) Je, watendaji hao huwa wanatumia vigezo gani mpaka kufanya hivyo bila ya kutoa taarifa kwa wamiliki.
- (b) Je, ni utaratibu upi uliowekwa kisheria kwa watendaji wa Serikali wanapopitia mashamba yote yaliyokodishwa kwa wananchi kutoka Serikalini.

Wizara ya Fedha na Mipango:

134. MHESHIMIWA OMAR SEIF ABEID (Jimbo la Konde)-
Atamuuliza Mheshimiwa Waziri wa Fedha na
Mipango.

Kwa kuwa kipindi cha Bajeti ya mwaka 2016/2017 Bodi ya Mapato Zanzibar ilikadiriwa kupatiwa jumla Tsh. Billioni 12 kutoka Mfuko Mkuu wa Serikali kwa ajili ya kutekeleza majukumu yake ikiwa ni pamoja na kukusudia kufikia lengo la kukusanya Tsh. 272.64 Billioni kutoka katika vyanzo vyake vya kodi na Tsh. 35.20 Billioni kutoka vyanzo visivyokuwa vya kodi.

- (a) Je, Mfuko Mkuu wa Serikali umetoa kiasi gani cha fedha kuwapa ZRB kwa lengo la kuongeza nguvu ili kujiimarisha katika kusimamia vyema ukusanyaji wa kodi.
- (b) Je, ZRB wamekusanya kiasi gani cha kodi hadi kufikia mwezi Februari, 2017, kwenye lengo la ukusanyaji kodi la 272.64 Billioni .
- (c) Je, ni lini ZRB itanza mpango wa lazima wa kuwasajili na kutoa namba za usajili walipa kodi kwa wafanyabiashara wote ambao hawajasajiliwa na kuondoa vikwazo kwa wafanyabiashara ili waweze kujisajili na kulipa kodi zao zinazostahiki kulipwa.

Wizara ya Elimu na Mafunzo ya Amali:

86. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Elimu na Mafunzo ya Amali:

Nyumba ya Skuli ya Jambiani kwa muda mrefu imekuwa katika hali mbaya, inavujiwa na hata mwalimu anayeishi mule anahangaika uhamisho ili apate sehemu ya kujisitiri. Pamoja na Waziri kuahidi kulishughulikia suala hili kwa maandishi lakini bado hakuna hatua zilizochukuliwa.

Je, ni lini suala hili litachukuliwa hatua ili kulitatua kama Waziri alivyoahidi kwa barua kuwa atalipatia ufumbuzi.

Wizara ya Kazi, Uwezeshaji, Wazee, Vijana, Wanawake na Watoto:

130. MHESHIMIWA OMAR SEIF ABEID (Jimbo la Konde)- Atamuuliza Mheshimiwa Waziri wa Kazi, Uwezeshaji, Wazee, Vijana, Wanawake na Watoto:

Kwa kuwa programu ya uratibu wa huduma za hifadhi ya jamii ilipanga kwa mwaka 2016/2017 kulipa fidia kwa watu 14 walioathirika kwa kupata ajali kazini.

- (a) Je, Wizara imeweza kukamilisha ahadi ya kuwalipa waathirika hao; na kama imeweza kulipa fidia hiyo, Unguja imelipa watu wangapi na Pemba wangapi.
- (b) Je, katika waathirika wa ajali kazini, wanawake ni wangapi, Taasisi au Kampuni ambazo walikuwa wakizifanyia kazi na baada ya ajali hizo wana uwezo wa kufanya kazi sehemu nyengine kutokana na athari walizozipata.
- (c) Je, ni kiasi gani cha fedha za fidia ambacho kimetolewa kwa waathirika hao wa ajali kazini.

Wizara ya Ardhi, Maji, Nishati na Mazingira:

53. MHESHIMIWA SIMAI MOHAMED SAID (Jimbo la Tunguu) – Atamuuliza Mheshimiwa Waziri wa Ardhi, Maji, Nishati na Mazingira:

Tangi la Maji la Unguja Ukuu ambalo limekuwa likitoa huduma kwa wananchi wa Uzi, Unguja Ukuu Kaepwani, Tindini, Kaebona pamoja na Kikungwi limechakaa na limeanza kuvuja.

Je, Serikali haioni umuhimu wa kubadilisha tangi hilo ambalo limeshapitwa na muda.

Wizara ya Ujenzi, Mawasiliano na Usafirishaji:

10. MHESHIMIWA OMAR SEIF ABEID (Jimbo la Konde)- Atamuuliza Mheshimiwa Waziri wa Ujenzi, Mawasiliano na Usafirishaji:

Kwa kuwa katika muhtasari wa matumizi ya 2015/2016 imeelezwa kwamba Serikali ilipata mkopo kutoka Saud Fund na BADEA kwa jumla ya Tshs. 400 Bilioni na fedha za ndani 2.4 zilizotengwa kwa ajili ya ujenzi wa barabara ya Konde - Wete na Wete – Gando. Na kwa sababu barabara hizo zilishakamilika kwa kiwango kizuri sana na kwa sasa zinatumika. Na kwa kuwa kuna taarifa kwamba Mjenzi wa barabara hizo bado hajakamilishiwa malipo yake ya mwisho.

- (a) Je, ni kweli kwamba mjenzi huyo (Kampuni ya MECCO) hajamaliziwa malipo yake ya mwisho.
- (b) Je, mkopo huo kutoka Badea na Saud Fund utalipwa kwa muda gani.
- (c) Kama mjenzi huyo hajakamilishiwa malipo yake ya mwisho, ni lini Serikali itamalizia malipo ya awamu ya mwisho ili apewe kazi ya ujenzi wa barabara nyengine.

III. KAULI ZA SERIKALI:

Makamu wa Pili wa Rais:

Kauli ya Serikali Kuhusiana na Skuli ya Darajani na Vikokotoni katika uendelezaji wa Ukanda wa Darajani (Darajani Corridor).

IV. HOJA ZA SERIKALI:

Waziri wa Ardhi, Maji, Nishati na Mazingira:

Kwamba Baraza hili lijadili Makusudio na Shabaha zilizomo katika Makadirio ya Mapato na Matumizi ya Wizara ya Ardhi, Maji, Nishati na Mazingira kwa Mwaka 2017/2018.

Waziri wa Fedha na Mipango:

Kwamba Baraza hili lijadili Makusudio na Shabaha zilizomo katika Makadirio ya Mapato na Matumizi ya Wizara ya Fedha na Mipango kwa Mwaka 2017/2018.

Zanzibar,
07 Juni, 2017.

(Raya Issa Msellem)
KATIBU WA BARAZA.